



Università degli Studi di Udine

COMUNICATO STAMPA

Apontament vinars ai 26 di Setembar a palaç Florio LENGHIS MINORITARIIS E PLURILINGUISIM, LIS ESPERIENCIS DI RICERCJE DAL ATENEU Taule taronde te suaze des Zornadis europeanis des lenghis

Udin, ai 24 di Setembar dal 2008 – “Diviersitât linguistiche e dialic interculturâl” al è il teme de taule taronde che si davuelzarà **vinars ai 26 di Setembar a lis 17.00 inte sale Florio di palaç Florio, in vie Palladio 8 a Udin**. L’incuintri al è inmaneât dal Centri interdipartimentâl di ricercje su la lenghe e la culture dal Friûl (Cirf) de universitât dal Friûl te suaze dal program des “Zornadis europeanis des lenghis”.

Pe ocasion a saran presentadis lis esperiencis di ricercje interdissiplinâr dal Cirf tal setôr des lenghis minoritariis, dal plurilinguisim e de didatiche. Anna Bogaro e fevelarà di “Diviersitâts linguistiche in literature”, Piercarlo Begotti al descrivarà une “Esperience in rêtet pes lenghis minoritariis neolatinis de Union latine: il Linmiter-Terminologjie des lenghis minoritariis” e Franco Finco al fasarà il pont su “Plurilinguisim e contats interlinguistics te storie dal Friûl”. Par finî, Silvana Schiavi Fachin e tratarà de “Diviersitât linguistiche e culturâl te strumentazion didatiche” presentant doi studis “Sghiribiç, sfueut didatic par imparâ a lei e a scrivi” e “Cressi cun plui lenghis/ Crescere con diverse lingue, une guide pai gjenitôrs e pai mestris” burîts fûr di Kappa Vu cul jutori dal ateneu e de Agenzie regionâl pe lenghe furlane.

La cunvigne si vierzarà cui salûts de direttore dal Cirf, Piera Rizzolatti, de preside de facultât di Lenghis e Leteraturis Forestis, Antonella Riem, e dal president de Agenzie regionâl pe lenghe furlane (Arlef), Lorenzo Fabbro. Il diretôr dal Servizi identitâts linguistiche, culturâls e corejonâi tal forest, Marco Stolfo, al tignarà la relazion di introduzion su “Lenghis minoritariis, pluralisim linguistic e dialic interculturâl”.

«La “Zornade europeane des lenghis” – e rimarche Rizzolatti – e je un apontament che a inmanein e a cjapin part di tancj agns l’Ateneu, il Cirf e la Facoltât di Lenghis, a prove di une atenzion costante e concrete par dutis lis lenghis minoritariis dal Friûl Vignesie Julie e no dome».

Lis Zornadis, in program dai 25 ai 27 di Setembar, lis inmanein la Regjon Friûl Vignesie Julie, la Agenzie regionâl pe lenghe furlane, la Provincie di Gurize, il Comun e la Provincie di Udin, la Biblioteche civiche “Vincenzo Joppi” di Udin e il Centri interdipartimentâl di ricercje su la lenghe e la culture dal Friûl dal ateneu.

UFFICIO STAMPA UNIVERSITÀ DI UDINE

Palazzo Florio, via Palladio 8 – 33100 Udine
tel. 0432-556270, fax 0432-556279, e-mail: ufficio.stampa@amm.uniud.it
Silvia Pusiol – 329 7506236, Stefano Govetto, Francesca Pelessoni